


# 大藏一覽



		五	漢
		三	書
		九	門
		六	
一	一	八	
一	一	八	
冊	架	函	號

內閣文庫		
三	五	漢
一	三	書
一	九	
一	六	
冊	架	函

內閣文庫		
番號	漢	5306
冊數	11	( 3 )
函號	311	9





大藏一

覽集卷第二

淺草文庫

寧德優婆塞陳 實謹編

第四門 良由善惡二途故使升沈六道

凡一十六品因緣四百一十九則

此門義廣分為四卷

三歸品第十八 十善品第十九

布施品第二十

三歸品第十八 五則



先自歸依佛法僧 由是修持身口意

羯磨經云歸依佛者歸於法身謂一切智無  
學功德五分所成歸依法者歸於自他盡處  
謂斷欲無欲滅諦涅槃歸依僧者歸於第一  
義僧謂良祐福田聲聞學無學功德也

入字  
函第

卷一 大方便經云三歸是三業性身口意業  
也又云三寶為所歸所歸以救護為義譬人  
有罪於王投向異國以求救護異國王言汝

來無畏莫出我境莫違我教必相救護眾生  
亦不繫屬於魔有生死罪歸向三寶以求救  
護若誠心三寶更無異向不違佛教魔王邪  
惡無如之何

器字函  
第六卷

華嚴經云自歸於佛

當願眾生體解大道紹隆佛種自歸於法當  
願眾生深入經藏智惠如海自歸於僧當願  
眾生統理大眾一切無礙

平字函  
第四卷

宗鏡云

教中道自歸依佛等終不云歸依於他故云



自性不歸無所歸處。夫歸者是還源義。眾生  
六根從一心起。既背自原。馳散六塵。令舉命  
根。惣攝六塵。還歸其本。一心之原。故曰歸命  
一心。即具三寶。又云一體三寶者。只是一心。  
心性自能覺照。即佛寶。心體本自性離。名法  
寶。心體無二。即僧寶。又云。璨大師問可大師  
曰。但見和尚。即知是僧。未審何者是佛。云何  
爲法。荅曰。是心是佛。是心是法。法佛無二。汝

知之乎

侈字函  
第六卷

天福大盡將猪報 佛授三歸證道因

折伏羅漢經云。昔忉利天子壽命垂盡。五衰  
相現。觀壽終後。墮猪胎中。愁悶不樂。有天語  
之。佛能脫卿之罪耳。即到佛所。作禮未問。佛  
告天子。一切萬物皆歸無常。汝素所知何爲  
憂愁。天具白佛。佛言。欲離豚身。當誦三歸。即  
從佛教。晝夜自歸。七日壽盡。下生維耶離國。



你長者子在母胞胎日三自歸始生墮地亦  
跪自歸舉家深恠謂之災感意欲殺之惟父  
有識曰此兒者非凡流世人百歲尚不曉自  
歸三尊况初墮地而能稱南無佛好視養之  
兒年七歲路逢舍利弗等小而能禮眾咸驚  
恠兒言道人不復見識我在天上應生惡道  
佛授自歸故得為人願以我言因請世尊諸  
菩薩僧及仁等也受請而去兒還以告父母

願辦供食父母異其年幼開發大心喜而營  
之佛及眾僧各作神足來應兒供以為說法

兒及父母內外親屬皆得阿惟越致

靈字函  
第二卷

十善品第十九

二十三則

聞見如來得清淨 修種善根悉不虛

華嚴經云一切眾生若有得見如來色身眼  
得清淨若有得聞如來名號耳得清淨若有  
得嗅如來戒香鼻得清淨若有得嘗如來法



味舌得清淨具廣長舌解語言法若有得觸  
如來光者身得清淨究竟獲得無上法身若  
於如來生憶念者則得念佛三昧清淨若有  
供養如來所經土地及塔廟者亦具善根滅  
除一切諸煩惱患得賢聖樂設有衆生見聞  
於佛業障纏覆不生信樂亦種善根無空過  
者乃至究竟入於涅槃復次應知於如來所  
見聞親近所種善根皆悉不虛出生無量覺

慧故離於一切障難故決定至於究竟故譬  
如丈夫食少金剛終竟不銷要穿身出何以  
故金剛不與肉身雜穢而同止故種少善根  
亦復如是穿煩惱身過究竟處何以故善根  
不與煩惱共故

黎字函  
第二卷

修一善能破百惡 投星火可藝聚薪

大涅槃經云富有二種一者象馬種種畜生  
二者金銀種種珍寶象馬雖多不敵一珠衆



生亦尔。一者惡富。二者善富。多作諸惡。不如一善修。一善心。破百種惡。如少金剛能壞須彌。亦如少火能燒一切。第一字函 第九卷 華嚴經云。假使乾草積同須彌。投芥子火。必皆燒盡。何以故。火能燒。故種少善根。亦復如是。必能燒盡。一切煩惱。究竟涅槃。何以故此少善根。性究竟故。黎字函 第一卷

禮佛頓獲五種福 持患能消百八愆

珠林舉增一阿含經云。禮佛有五功德。一者端正。以見相好。生尊上。故。二得好聲。以歌詠佛等。正覺。故。三多饒財。以具香華。為供養。故。四生處高貴。以膝著地。長跪禮。故。五生天上。以念佛。功德。應尔。故。藁字函 第十卷 木患經云。波瑠瓠王白佛。我國中災患。使我憂勞。不得修行。願賜易修要法。佛告王言。若欲滅煩惱障。報障者。當貫木患子一百一十八。以常自隨行。



住坐臥恒當志心無分散意稱佛陀達磨僧  
伽名乃過一木患子如是漸次度患木子若  
十若二十若百若干乃至百千萬若能滿二  
十萬遍身心不亂無諸諂曲捨命得生第三  
炎天滿百萬遍當得斷除百八結業始名背  
生死流趣向泥洹斷煩惱根獲無上果大王  
禮謝即辨木患以為千具六親國戚皆與一  
具王常誦念雖親軍旅亦不廢置又作是念

世尊大慈普應一切若我此善得免長淪苦  
海佛當現身為我說法願樂迫心三日不食  
佛即應形至其宮內而告王曰苾芻比丘誦  
三寶名經歷十歲得成斯陀含果漸次習行  
今在普香世界作辟支佛王聞是已倍復修  
行佛告阿難何況能誦三寶名經歷萬數但  
能聞此人名生一念隨喜者未來生處常聞

十善眾喜奉行

學字函  
第四卷



臨難一稱南無佛隨聲大救滿船人附滅獄火  
智度論云念佛三昧有大福德能度衆生如  
昔日有五百估客入海採寶值摩伽羅魚王  
開口海水入中船去駛疾船師問樓上人汝  
見何等答言見三日出白山羅列水流奔趣  
如入大坑船師言是摩伽羅魚王開口一是  
實日兩是魚眼白山是魚齒水流奔趣是入  
其口我曹了矣各各求諸天神以自救濟是

時諸人復求所事都無感應中有五戒優婆  
塞語衆人言佛能救厄當共同聲稱南無佛  
此魚先世是佛破戒弟子聞稱佛聲得宿命  
智心自悔悟即便合口船人得脫以念佛故  
俱免死厄聖字函第七卷珠林舉譬喻經云昔有  
國王煞父自立有阿羅漢知此國王不久命  
終計其餘命不過七日若命終後必墮阿鼻  
地獄一劫受苦此阿羅漢尋往化之勸教至



心稱南無佛七日莫絕王便一心稱念晝夜  
不廢至于七日便即命終魂神趣向阿鼻地  
獄乘前念佛至地獄門即便大聲稱南無佛  
罪人咸聞一時同聲稱南無佛地獄猛火即  
時化滅一切罪人皆得解脫藁字函  
第三卷法華  
偈云若人散亂心入於塔廟中一稱南無佛  
皆已成佛道樹字函  
第一卷

四方山合王何計 一念檀修自可超

涅槃經云佛告波斯匿王有親信人從四方  
來各作是言有四大山從四方來欲害人民  
當設何計王言世尊設有此來無逃避處唯  
當專心持戒布施我即讚言善哉大王我說  
四山即是衆生生老病死常來劫人云何不  
修戒施王言世尊持戒布施得何等果佛告  
大王於人天中多受快樂躰字函  
第九卷  
受佛付囑賓頭盧 為世福田檀越供



珠林云賓頭盧尊者受佛教勅為末法人作  
大福田有一長者凡三次如法施設大會至  
心敬請於黓毘下遍敷好花驗之大眾食訖  
發視黓毘之下花悉萎黃懊惱自責不知過  
所從來復請百餘法師求請所失懺謝罪過  
有一上座告之三會請我皆來以我年老衣  
服弊壞汝自使奴門中見遮我遂強入被打  
頭破右額瘡是第二會來復打額中瘡是第

三會來復打左額瘡是汝自為之何所懊惋  
言已不見長者乃知是賓頭盧自余以來諸  
人設福皆不遮門精誠感徹無不至也或在  
上坐或中下坐人求其異終不可得坐花不  
萎乃知之矣今見齋家多不依法但逐人情  
安置凡俗全不愛佛及於聖僧如經所說施  
主闔家虔誠預前七日掃灑佛堂及安置聖  
僧坐處洗浴潔身燒上名香懸繒幡蓋散眾



雜花手執香爐盡誠敬仰奉請三寶及以聖  
僧十方法界一劫聖凡受弟子請降屈聖儀  
若是貧家無好香花復無安置之處臨時斟酌  
酌僧未坐前先上好處安置佛座次聖僧座  
敷設新淨軟物布絲在上若施主心重有感  
似人坐處即知報身來赴若無相現但化身  
來若是輕慢報化俱不至其坐不得綵畫錦  
綺綾羅金銀雜飾及散花置上雖是羅漢然

共凡僧同受二百五十別解脫戒所以不受  
雜絲金銀等物若是諸佛菩薩大乘之人非  
苟出家相者所以得受種種供養安聖僧座  
及以獻食高處安置尺六已下不得作塑形  
聖僧在座安置儻報身自來豈可推却塑像  
而坐若有聖僧錢還入聖僧用然燈燒香冬  
夏四時隨宜供養豈得互用若已用者並須  
倍還不還得罪四分律云許此處不得異處



得罪若是隨家常食每旦及午供養三寶心

常不絕功德無量漆字函 第二卷

食有四種時非時 菓及一切聽不聽

珠林問何名食時何名過時答曰依四分律

云謂明相出時始得食粥明相未出 即是非時乃至日

中按此午時為法即是食時僧祇律云過此 午時影一髮一

是非時也 昆羅三昧經佛說食有四種

旦天食時午法食時暮畜生食時夜鬼神食

時佛斷六趣因令同三世佛故日午時是法

食時也過此已後同於下趣非上食時故曰

非時也 處處經云佛言中後不食其有五

福一者少媯二者少臥三者得一心四者無

有下風五者身得安穩亦不作病 優婆塞

戒經云凡所食者要先施於沙門梵志然後

自食當作是念初下一匙飯時願斷一切惡

盡下第二匙時願修一切善滿下第三匙時



願所修善根回施衆生普共成佛 四分律

云一切苦辛鹹甘等不任爲食者聽非時盡  
形作藥服 善見論云一切樹木及果根莖

枝葉等不任爲食者並得作盡形藥服

來字  
函第

卷二

雖獻一香一佛所 能遍無量無邊方

三昧海經佛告阿難若禮一佛當作是念諸

佛心智無有限礙我今禮一佛即禮一切佛

若思惟一佛即見一切佛見一一佛前有一

行者接足作禮皆是己身若以一華供養佛

時即當作想身諸毛孔令一毛孔出無數華

雲運想擬意供一切佛一一佛上化成華臺

諸佛受之於十方界施作佛事供養香等亦

復如是當發是願願此華香滿十方界供養

一切佛化佛并菩薩無數聲聞衆受此香華

雲以爲光明臺廣於無邊界無量作佛事禮



佛若坐禪起是供養心常當發是願繒蓋幢  
幡音樂偈頌亦作是願我今設此少分供具  
願此供具遍供十方一切諸佛諸佛受之於  
幢幡中化光明雲於伎樂中偈頌之中演好  
法音

覆字函  
第十卷

五事不懈漸加功 十善圓成無上果

四十二章經云衆生以十事為善十事為惡  
身三口四意三身三者殺盜媼口四者兩舌

惡罵妄言綺語意三者嫉恚癡不信三尊以

邪為真優婆塞行五事不懈退至十事必得

道也

辯字函  
第七卷

華嚴經云十善業道是人天

乃至有頂處受生因又此上品十善業道修

入聲聞緣覺菩薩乘又上上品十善業道成

就菩提

愛字函  
第五卷

佛尚貫鍼貪少福 人何厭善不勤修

增一阿含經云阿那律尊者以凡常之法而



縫衣裳便作是念得道阿羅漢誰與我貫鍼  
世尊至而告曰汝持鍼來吾爲汝貫阿那律  
曰向所稱說者謂世間欲求福者與我貫鍼  
世尊告曰世間求福之人無有厭足無復過  
我如字函  
第一卷

滴善寄佛祝藏之 經劫還渠終不失

泥洹經云佛告阿難若有衆生於諸佛所一  
發信心如是善根終不敗亡何況復作諸餘

善根譬如有人毛端露一滴水持至我所而  
作是言我以此水寄付瞿曇莫令風日飄暴  
乾竭不令鳥獸飲之令盡勿使異水而有和  
雜如來即受彼寄置恒河中隨流而去使不  
入洄復無遮礙諸鳥獸等不能飲盡如是水  
滴共大水聚漸入大海毘嵐風起壞世界時  
而來我所言所寄水今無有耶如來知我水  
滴住處不雜餘水不增不減平等如故持還



彼人如是如來應正遍知大智多能於受寄  
人中最尊最勝經於久遠而不虧損此義應  
知毛端者喻心意識恒河者喻生死流一滴  
水者喻一發微少善根大海者喻佛如來所  
寄人者喻彼長者居士等久遠不虧者喻善  
根不失歸字函  
第三卷

畜生念佛皆成道 蛤兒聞法也生天

般泥洹經云若復有人但心念佛一生敬信

我說是人當得涅槃果盡涅槃際且置人中  
念佛功德若有畜生於佛世尊能生念者我

亦說其善根福報當得涅槃歸字函  
第二卷 經律

異相云迦羅池中有一蛤兒聞佛說法即從  
池出入草根下是時一牧牛人見衆圍遠聽  
佛說法前詣佛所欲聞法故以杖刺地誤著  
蛤頭蛤即命終生忉利天尋即思惟我先為  
畜何因緣故生此天宮觀見因於聽法得此



果報時。蛤天人即乘宮殿。往至佛所。禮謝佛。

為說法。得須阨沮果。

啓字函  
第八卷

布施品第二十

七十九則

給孤謀略纒營寺

天界宮成先待渠

經律異相云。佛大檀越。須達多長者。居舍衛國。常施孤獨。故曰給孤獨。因往王舍城。護彌長者家。為男求聘。因見其家。請佛說法。須達本事。外道忽聞佛法。生歡喜心。接足作禮。而

白佛言。我舍衛國人多信邪。弟子欲營精舍。請佛往化。願垂聽許。佛默受請。即遣舍利弗。指授規則。遍處求踏。唯有祇阨太子一園。廣八十頃。林木鬱茂。幽靜可居。既得勝地。往白太子。太子戲曰。滿以金布。便當相與。須達喜曰。此園已屬我矣。太子對曰。我戲語乎。兩成興諍。時首阨天下。為評議。以太子法。不應妄語。價既已決。不宜中悔。須達出金布八十頃。



須臾欲滿尚缺少地祇叱即語須達園地屬  
卿樹林屬我共以上佛捉繩定基之際舍利  
弗忽笑須達問其故荅曰汝始於此經營而  
六欲天宮殿已成汝果報也即借須達道眼  
果見問舍利弗是六欲天何處最樂舍利弗  
言第四欲天補處菩薩常彼說法須達言我  
生此出言既竟餘宮悉滅精舍告成凡千二  
百處白王遣使請佛安居

靈字函  
第三卷

阿育曩生因施土 厥功後世報為王

阿育王經云佛在世時入王舍城乞食見二  
小兒一名德勝二名無勝弄土而戲攤以作  
城舍宅倉庫以土為麩著於倉中見佛相好  
德勝歡喜掬倉中土名為麩者奉上世尊而  
發願言使我將來蓋於天地廣設供養緣是  
善根發願功德佛般涅槃一百年後作轉輪  
王王闍浮提

府字函  
第一卷

又雜阿舍經云阿育



主問諸比丘言誰於佛法中行大布施諸比丘言給孤獨長者捨百億千金乃大檀越王亦欲施百億千金時造八萬四千寶瓶及諸幡蓋付諸夜叉於閻浮提一切國土乃至大海起塔謬耶舍尊者云欲於一日一念之中起八萬四千寶塔一時俱成於彼一一塔中復施百千金復作五百大會會有三百千比丘用三百億金供養如是計用九十六億千

金王後得病以未滿願即辦珍寶送雞摧寺中諸臣白太子庫藏已竭令典藏者勿復出與大王用之時王既知索物不得所食金器盡送寺中太子令斷金器勅以銀器王復送寺銅器亦然至用瓦器時大王只有半箇阿摩勒果在手悲淚呼傍臣言此閻浮提是我所有今於財寶不得自在唯此半果我得自由令送寺中研磨為漿和石榴羹供養眾僧



庶得周遍。此是最後檀波羅蜜。哀憫我故受納此施。時王復問羣臣。誰是闍浮提王。臣奏大王是也。王曰。我今以此闍浮提施與三寶。隨意用之。而說偈曰。

今此闍浮提 多有珍寶飾 施與良福田  
果報自然得 以此施功德 不求天帝釋  
梵王及人主 世界諸妙樂 如是等果報  
我悉不用受 以是施功德 疾得成佛道

為世所遵仰 成得一劫智 世間作善友

導師最第一

川字函  
第五卷

舉家皆福隨人感 往世同食施佛來

五分律云。昔跋提城有長者。名文荼。舉家兒婦。以至奴婢。皆大福德。長者入倉。空中雨穀。出而後止。婦取飯器。分布內外。隨取隨滿。兒捉金囊。瀉出真金。注而不竭。兒婦出米一斛。供家一月。而亦不盡。其奴耕時。輒成七壠。其



婢磨香半兩塗家內外亦不減盡四方人聞  
莫不來觀及瓶沙王與天眷至果見如是歎  
服不已長者白佛我兒婦等皆云已福竟是  
誰力唯願說之佛荅汝等共有此福昔王舍  
城一織師家因辟支佛持鉢乞食織師令以  
已飯施之婦讓夫食持我分與兒至奴婢逆  
相讓施辟支佛言汝等皆已捨分與我善心  
爲畢可共減與汝食不少我亦得足人減一

匙平滿彼鉢辟支受施神變而去彼等命終  
生六欲天展轉七反餘福生此織師眷屬今

汝等是

和字函  
第一卷

兒婦行檀宮殿樂 公姑障施渴飢羸

譬喻經云舍衛城東有一婆羅門大富其子  
娶得事佛家女奉五戒持六齋常好布施勸  
夫行檀夫即開解白其父母父母大恚謂破  
吾家婦持錢帛與夫夫持與守閤婢婢持與



守門奴奴送佛寺布施夫婦誓言施若有福者當使天下人皆共見之然後國俗三月三日舉國人民皆至水上作樂忽東南角有一天人騎一白馬乘空而過眾人仰問是何神靈荅曰問後來者須臾復見七寶宮殿有一玉女獨坐其上四大天神接殿飛行眾人又問君何功德玉女亦令問後來者俄而復見大七寶殿一天一女共坐其中前後妓樂十

二天神共接其殿眾人又問有何功德亦荅

問後來者須臾復見二薜荔鬼

乃饑鬼之異名

身長

三丈黑瘦醜陋饑渴苦痛身中焦然各捉大棒更相搗打眾人又問荅曰諸君還聞舍衛城東大富婆羅門否騎白馬者是守門奴小殿玉女者是守閤婢大殿二人我兒與婦二鬼是婆羅門夫婦前世愚癡不信正法今當

厄禍可復奈何

荅字函第一卷



婢施一金公主貴 貧捨兩錢正后榮  
法苑珠林云阿育王宮有一婢使見王作福  
自剋責言王先身時布施如來一掬土故得  
此富貴今日復作將來轉勝我先身罪今日  
斯下又復貧窮無可修福將來轉賤何有出  
期思已啼哭偶因掃地得一銅錢即施衆僧  
心生歡喜不久病終託阿育王夫人腹中爲  
女出世端正殊妙右手常捲年滿五歲王抱

膝上摩手即開有一金錢隨取隨生而無窮  
盡須臾之間金錢滿藏王恠所以往問夜奢  
羅漢荅言此女先是王婢掃糞壤中得一銅  
錢布施衆僧生爲王女報應如此 又云耆  
闍崛山多有僧住送供者衆有一乞女作是  
思惟彼諸人等先世修福此生富貴今復重  
作未來轉勝我先不修此生貧苦今若不作  
未來轉劇傷心啼哭先於糞中拾得兩錢恒



常保惜乞不得時當用買食我今捨於不得  
食意即施衆僧時維那僧前欲爲呪上座不  
聽自爲呪願復留食與諸人既見上座與食  
皆減與之女大歡喜便得果報出到樹下食  
竟而臥施福所感黃雲覆之時值國王喪大  
夫人遣使訪有福德者至彼樹下見此貧女  
相師占之堪爲夫人沐浴更衣千乘萬騎迎  
至王所王喜甚重後念我今得是福報緣以

兩錢施僧即白王言聽往報恩便以車載珍  
寶飲食詣山布施上座即令維那呪願夫人  
念言前施兩錢上座爲呪今載珍寶何不爲  
呪年少比丘亦嫌此事上座尔時與夫人言  
我佛法中唯貴善心不貴珍寶夫人先施兩  
錢之時善心極勝今施珍寶吾我貢高是以  
我今不爲呪願年少比丘聞已慚愧時爲說  
法夫人衆僧皆證初果

啓字函  
第一卷



三錢布施五里歡 後生伏藏如斯廣  
雜寶藏經云昔思生王遊觀林苑見一金猫  
入西南角遣人發掘得一銅盆盆受三斛滿  
中金錢漸漸深掘復獲一盆次第而得三重  
之盆復從傍掘展轉不已滿五里中盡得銅  
盆滿盛金錢如初不異時王奇怪即詣尊者  
迦旃延所具論得錢因緣欲用得無災患否  
尊者荅言此王福報但用無苦是婆佛時有

諸比丘於四衢道施大高座置鉢在上而作  
是言世人能於堅牢藏中若舉錢財入此藏  
者水不能漂火不能燒王不能奪賊不能劫  
有賣薪人得三文錢聞此語已生歡喜心捨  
著鉢中誠心發願去舍五里當還家時步步  
歡喜既到其門向勸化處至心復願然後入  
舍亦賣薪人今王是也緣施三錢世世尊貴  
常得如是三重盆錢緣五里歡當滿五里有



此錢藏王聞宿緣歡喜而去

驚字函  
第七卷

施一菓多劫無病 施一食七反為天

付法藏經云昆婆尸佛時有一比丘頭痛之患薄拘羅尊者夙為貧人因持一訶梨勒菓施之病愈緣施菓故九十一劫天上人中享福快樂未嘗有病最後生婆羅門家其母早亡父嫗後妻拘羅年幼見母作餅從而索之後母憎嫉即捉拘羅擲置釜上釜雖焦熱不能燒害母後煮肉拘羅復索母益瞋恚尋擲釜中亦不能煮母後向河拘羅逐去尋擲水中大魚吞之遭捕入市遇父買歸將剖魚腹拘羅尚活告父安座無至傷兒父既見子喜拘而出長大出家得羅漢果釜熱不焦釜煮不爛水溺不漂魚吞不死刀割不傷年百六十無疾由施病僧一菓

漆字函  
第二卷

達磨顯宗

論云無滅尊者昔於殊勝福田因一施食異



熟從茲七反生三十三天七生人中為轉輪

聖帝最後生在大釋

自字函  
第三卷

施一縷成就善提

施一燈亦得作佛

寶積經云旁耆羅私佛在世時有紡績者名  
績常紡微綫奉施如來因白佛言願愍我故  
受此縷綫為攝受處以此善根於未來世得  
成如來能攝一切如是日施一縷滿千五百  
由此福故十五拘胝不墮惡趣千拘胝反為

轉輪王千拘胝反作天帝釋奉觀千拘胝佛  
又以香華衣服之屬供養如來從是以後經  
一阿企耶劫出現於世證大菩提號善攝受  
如來由施微縷發心大故次第展轉成滿佛  
法當知由心不由於縷而說頌曰 行施不  
求妙色財亦不願感天人趣為求無上勝菩  
提施微而獲求大果

鳥字函  
第一卷

阿闍世王受

決經云王飯佛已還於祇洹王多然燈具百



斛油從宮直至精舍時有貧母常欲供佛而無資財見王作此功德彌切傷感乞得兩錢至麻油家就買食膏當於佛前然之心計此膏不足半夕乃自誓言若我後世得道如佛膏當通夕光明不消作禮而去王所然燈或減或盡雖有人幹常不周匝貧母一燈迥然獨耀通宵不滅膏又不盡及至明朝佛告目連可滅諸燈目連乃滅唯有貧母一燈三滅

不滅便舉袈裟扇之益明乃以神通引毘嵐風吹之轉熾上照梵天傍照三千大千世界佛告目連止止此當來佛之光明功德非汝威神所滅此母宿曾供養百八十億佛已從前佛受決務以經法開化人民未暇修檀故今貧窮無有財寶後三十劫功滿作佛號曰

須彌燈光如來

傷字函  
第七卷

花奉慈尊蒙記荊

草蓋如來證辟支



採花違王上佛經云王勅園監晨採好花皆送入宮中路遇佛聞法歡喜以所持花悉散佛上佛授決曰汝已供養九十億佛却後百四十劫汝當作佛號曰妙華如來傷字函第七卷菩薩本行經云佛在鬱單羅延國領千二百衆行村落間時天盛熱路無蔭涼一放羊人念言三界之師冒涉盛暑編草作蓋用覆佛上擬隨佛行去羊大遠放蓋擲地還趣羊邊

佛告阿難此人敬心草蓋覆佛十三劫中天  
上世間生尊貴處常有自然七寶之蓋而在  
其上竟十三劫出家爲道成辟支佛名阿耨

婆達器字函

採花上佛方途半 偶亡乘善達天中

譬喻經云昔有牧羊小兒因見池生五色蓮  
花採以上佛未及於寺遭牛觸殺生初利天

啓字函  
第四卷



施寺未住雨爲壞 蒙佛曾臨福必然  
毘柰耶經云昔六衆闡陀化一長者捨造一  
寺下無水竇上無泄渠寺方成已明日慶讚  
佛知此寺夜後崩墮施主大惱而取命終勅  
諸苾芻有定力者於初夜分往詣闡陀所造  
寺中各修善品世尊於後夜分亦往彼寺起  
世俗心諸佛常法起世俗心者帝釋諸天皆  
悉知意而來雲集佛爲宣說諸法無常時諸

苾芻與佛俱去至後夜時風雷大雨水無出  
處寺便崩倒天明施主詣寺慶讚作如是念  
捨無量財未曾受用遂見崩墮悶絕于地少  
頃蘇醒佛令難陀告長者曰多有施主奉爲  
如來造立房舍然佛世尊竟不受用於彼施  
主福亦隨生何況汝寺於初夜時有耆宿德  
苾芻皆入受用世尊亦往諸天來集宣說妙  
法福利無邊長者聞已深生歡喜

而字函  
第十卷



又云房始成時一新受戒年少比丘戒德清淨入此房中已畢檀越信施之德若起億數種種房閣種種莊嚴下至金剛地際高廣嚴飾猶如須彌設若有一淨戒比丘暫時受用已畢施恩何以故佛於無量劫中修菩薩行今得成佛始體解波羅提木叉以授衆生非世間法是背離世俗向泥洹門凡房舍臥具飲食湯藥是世間法非是離世間難得之法

子字函  
第七卷

人獸佛乞太頻頻 佛告汝福亦數數

雜阿含經云佛於晨朝入舍衛城乞食到突邏閣婆羅門家盛滿美飯以奉世尊於第二日及第三日復詣乞食彼婆羅門作念數來佛知所念即說偈言 天雨數數降五穀數數熟道人數數乞檀越數數與數數生天上數數受果報婦女數懷妊數數生子息數數



泔牛乳數數得酥酪數數受於生數數消滅  
盡數數至於死數數悲苦惱亦復數數燒數  
數埋塚墓得斷後有道則止不數數若不數  
數生亦不數數死得不數數憂亦不數號哭  
時婆羅門施食奉上世尊不受當以與誰佛  
言我不見沙門婆羅門若魔若梵若食此食  
有能如法得消化者佛復言此食宜應置於  
無蟲水中無蟲草中時婆羅門承佛教勅尋

置水中即時熾然煙燄俱出淅淅振聲婆羅

門歎言希有投佛出家

息字函  
第四卷

因兄勸施必獲報 開庫望來何太忙

布施望即報經云目連有弟巨富兄告之曰  
聞卿慳恡不好惠施佛常顯說惠施之者獲  
報無數弟既聞之開藏布施更新立庫欲受  
其報未經旬日財寶竭盡故藏悉空新藏無  
報向兄曰何誤乎目連曰止止無使邪見之



士聞此。鹿言。吾今權且示汝微報。以神足力。接其弟。至第六天上。彼有宮殿。七寶合成。庫藏盈滿。玉女營從。數千萬眾。純女無男。弟問目連。是何宮殿。巍巍乃尔。目連告弟。汝自往問。天女報曰。目連有弟。大富布施。命終之後。當來生此。作我等夫。其人聞喜。詣兄懺悔。還於世間。廣施不倦。丙字函 第四卷 病僧須肉買俱無。斯那割股。誠可功。

賢愚因緣經云。昔優婆夷摩訶斯那。常以四事供養佛僧。見病比丘。問欲何食。荅言。欲熱肉汁。而禁屠殺。即使人以金錢等。重尋買。俱無。斯那思惟。往昔菩薩。以一鵠。故猶自割肉。不惜身命。况佛弟子。而不濟彼。作是念已。即割股肉。合諸藥草。煮以爲臠。送病比丘。食已。

頗愈

盤字函 第三卷

若飯凡夫百有眾。不如持戒一善人。



四十二章經云飯百凡人不如飯一善人飯  
十善人不如飯持五戒者一人飯持五戒者  
萬人不如飯一須陀洹飯須陀洹百萬不如  
飯一斯陀含飯斯陀含千萬不如飯一阿那  
含飯阿那含一億不如飯一阿羅漢飯阿羅  
漢十億不如飯一辟支佛飯百億辟支佛不  
如以三尊之教度其一世二親教親千億不  
如飯一佛

辭字函  
第七卷

供養無量百千佛 不如無心一道人

施有三法

指要錄云佛為須達說布施果報謂多施少  
報少施多報供養百千白衣不如供養一淨  
行乃至供養百千諸佛不如供養一無心道  
人

溪字函  
第四卷

法苑云施有三法一送食至寺

名上就舍供養名中造舍乞施發心供養名

漆字函  
第二卷



施食獲五無量福 供僧亦七無盡功  
食施獲五福報經云佛言食施有五功德一  
曰施命二曰施色三曰施力四曰施安五曰  
施辯何謂施命人不得食七日壽終智者能  
施則為施命其施命者世世長壽財富無量  
何謂施色人不得食顏色顛顛智者能施則  
為施色其施色者世世端正人見歡喜何謂  
施力人不得食身羸意弱智者能施則為施

力其施力者世世多力終無耗減何謂施安  
人不得食心愁身危智者能施則為施安其  
施安者世世安穩不遇災患何謂施辯人不  
能食困不能言智者能施則為施辯其施辯  
者世世通達人採法言是為五福食之報也  
漆字函  
第二卷 尊那經云尊那尊者白佛無盡功  
德還可得否佛荅無盡功德甚深微妙若人  
歸心獲大果報乃有七種若善男子信心布



施園林池沼充四方僧經行游止此是第一  
無盡功德復於彼中建立精舍衆僧安止此  
是第二無盡功德彼精舍內布施坐臥之具  
所謂牀椅氈褥衣被種種受用之物此是第  
三無盡功德復施財穀供養衆僧此是第四  
無盡功德復於往來衆僧常施所須之物此  
是第五無盡功德復於病苦者能行布施及  
者病者亦行布施此是第六無盡功德乃至

雨雪寒冷能修種種飲食湯藥衣被鞋履之  
屬供給衆僧得大安樂此是第七無盡功德  
若人具足此法獲大果報

輦字函

廣施七種梵天福 敬施五人大果功

佛說福田經云廣施有七一者興立佛圖僧  
房堂閣二者園菓浴池樹木清涼三者常施  
醫藥療救衆病四者作堅牢船濟渡人民五  
者安設橋梁過度羸弱六者近道作井渴乏



得飲七者造作清廁施便利處是為七得梵

天福

漆字函  
第三卷

雜毘曇心論云施五種人得

大果何以故父母長育生身恩故施得大果

病者無依增悲心故施得大果善說法者示

善惡故施得大果近佛地者積集功德攝眾

生故施得大果

華字函  
第八卷

又雜阿含經云波

斯匿王白佛應施何處當得大果佛言我今

問汝隨意答我譬如戰鬪集諸戰士而有瘞

羅門子從東方來刹利童子從南方來鞞舍

童子從西方來首陀羅童子從北方來不善

兵法畏憚前敵如此士夫王當賞不王白佛

言不賞佛告大王臨戰鬪時有婆羅門等童

子善學武藝能破巨敵如此戰士加重賞不

王白佛言重賞佛告大王如是沙門婆羅門

遠離五支成就五支建立福田施此田者得

大福利得大果報何等為捨離五支謂斷貪



欲蓋瞋恚睡眠掉悔疑蓋何等為成就五支  
謂成就無學戒身定身慧身解脫身解脫知  
見身不字函  
第二卷

施瀦呪福晒其虛 示舌覆面言何妄

普曜經云諸婆羅門因共立制若與佛食共  
佛語者罰金錢五百時佛入城乞食人皆閉  
門空鉢而出有一使女以破瓦器盛臭瀦澱

二音  
齏殿

出門弃之見佛空鉢信心清淨欲興供

養無由如願云此弊食須者可取佛知彼意  
即受其施而說女人施食十五劫中天上人  
間受福快樂不墮惡道後得男身出家學道  
成辟支佛婆羅門云佛為食故妄語如此不  
堪臭食果報尔重佛即出舌覆面上至髮際  
語婆羅門汝見經書頗有此舌作妄語不婆  
羅門言如此舌者心不妄言禮佛悔過佛為  
說法得初道果即大聲告眾曰甘露門開如



何不出諸婆羅門迎佛供養皆得淨信

啓字函第

卷一 壽命童子經偈曰 日月星辰可墜地

山石從地可飛空海水淵深可令枯佛語決

定無虛妄

第 二 卷

施少福多誰肯信 種小樹大我何誣

雜譬喻經云舍衛城外有清信女佛至分衛

飯著鉢中作禮佛為呪願種一生十種十生

百種百生千乃至生萬生億得見道諦其夫

不信問佛何過甚哉施一鉢飯得尔多福復

見道諦佛言卿見尼拘類樹高幾許答高四

十里歲下數萬斛實佛言汝語何過甚乎種

如織芥高四十里下萬斛子答曰實尔佛言

地者無知其報力尔何況歡喜持一鉢飯上

佛其福不可稱量夫婦心意開解得須臾

道 圖字函

鼠雀有侵依我活 慈悲無害施功深



優婆塞戒經中云若復田倉多有鼠雀犯暴  
穀米但作是念如是鼠雀因我得活念已歡  
喜無觸惱想當知是人得無量福

射字函  
第五卷

富貧因乞俱生惱 苦樂良由一念差

法苑云有二種人一則大富一則貧窮有乞  
者來如是二人俱懷苦惱有財物者懼其乞  
索無財物者我當云何得少財物與之如是  
二人憂苦雖同果報各異貧悲念者生人天

中受無量樂富慳貧者生餓鬼中受無量苦

府字函  
第一卷

貧施富慳由夙習 既富無榮悔施愆

彌勒所問經云富人慳惜貧者能捨其義云  
何荅曰彼人過去雖久習慳忽遇清淨福田  
少行布施是故願得今身富樂以習成性慳  
猶不捨貧能施者彼人過去於非福田無信  
心故不至心故為名稱故為求事故求尊重



故彼人能施以是義故不得富報習施來故  
今猶能捨傳字函 第三卷雜阿含經云舍衛城長  
者名摩訶南無有子胤遇患命終家財入官  
金銀珍寶數千億萬不可稱計以慳貪故惜  
不食噉所可食者極為麤澁若食羹時羹薑  
一把羹已還取賣為財用所可著者唯衣履  
布乘朽故車連綴樹葉以為傘蓋未曾見其  
修少布施沙門婆羅門貧窮乞兒又復不能

供養父母妻子奴婢佛言愚人非善丈夫此  
摩訶南曩施辟支一飯不至心施不自手施  
撩擲而與後復生悔由先施食得生富家有  
悔心故自然不喜享用而又往世為錢財故  
殺異母弟經地獄苦後報人中錢財七反常  
沒於官摩訶南施辟支食受福已盡入于地

獄

息字函 第三卷

食不出生非佛子 施非隨分豈智人



大涅槃經云佛遊聚落樹下一神名曰曠野  
純食肉血日食一人我為說法然彼愚癡不  
受教道我即化身為大力鬼動其宮殿令不  
安所彼鬼迷悶我以慈憫手摩其身即還坐  
起生善信心我復本相為說法要受不殺戒  
彼鬼白言我及眷屬唯仰血肉以自存活今  
以戒故當云何活我即荅曰今勅弟子隨有  
修行佛法之處令施汝食不能施者非吾弟

子

一字函  
第七卷

施食偈云汝等鬼神衆我今施

汝供七粒遍十方一切鬼神共 優婆塞戒

經云若多財寶有良福田內無信心不能奉  
施亦名貧窮是故智者隨有多少任力施與

對字函  
第四卷

愛心擇捨福不廣 弃親著施果尤虧

法苑云佛之姨母摩訶波闍波提佛已出家  
手自紡績預作一端金色之氎積心係想奉



上如來佛令持施眾僧波提重白佛言自佛  
出家心每思念故手自作唯願垂愍為我受  
之佛告之曰知母心專欲用施我然恩愛心  
福不弘廣若施眾僧獲報彌多我知此事是  
於相勸府字函 第一卷 優婆塞戒經云若惱眷屬  
得物以施是人未來雖得大報身當病苦若  
先不能供養父母惱其妻子困苦奴婢而布  
施者是假名施不名義施名無憐愍不知報

恩是人未來雖得財寶常失不集不能出用

身多病苦

尅字函 第五卷

施有五種為如法 復於五事所不應

法苑論云財施有五種一至心施二信心施  
三隨時施四自手施五如法施 又云所不  
應施復有五事一非理求財不以施人物不  
淨故二酒及毒藥不以施人亂眾生故三置  
羅機網不以施人惱眾生故四刀杖弓箭不



以施人害衆生故五音樂女色不以施人壞

淨心故

府字函  
第一卷

莫謂非理施無益也從惡趣得優游

大智度論云若人鞭打拷掠閉繫非理得財而布施者生象馬牛中雖受畜形負重鞭策羈絆乘騎而得好屋好食爲人所重以人供給又如惡人多懷瞋恚心曲不端而行布施當墮龍中七寶宮殿妙色好食又如憍人多

慢瞋心布施墮金翅鳥中有如意珠以爲瓔珞變化萬端種種所須無不如意又如宰官之人枉濫得財以用布施墮鬼神中作鳩槃荼鬼種種變化五塵自娛又如多瞋狠戾好嗜酒肉之人而行布施墮地夜叉鬼中常得種種音樂飲食又有人剛暴強梁而能布施車馬代步墮虛空夜叉中而有大力所至如風又如有人妬心好諍能以房舍臥具衣



服飲食布施生宮觀飛行夜叉中種種娛樂  
有便身物若惱前人強求其物而營福者反  
招其罪不如淨治內心得利轉勝德字函  
第二卷  
既我無施宜緘口 遮彼行檀自取殃  
百緣經云目連入王舍城乞食見五百餓鬼  
白言尊者願再哀愍語我家中言我等輩為  
長者子在日放逸不好布施不信三寶見諸  
沙門入城乞食既不自施逆遮他人言此道

人不自生活但仰百姓今若與者後日復來  
終無厭足以是業緣墮餓鬼中唯願尊者語  
諸親里共設大會請佛及僧使脫此身目連  
告曰汝等至會所不餓鬼荅曰身如燋柱腹  
如大山咽如細針髮如錐刀肢節洞然馳走  
求食了不能得設見甘饌變成膿血云何能  
詣會所用連如言語其眷屬為設會時入定  
遍觀彼諸餓鬼不見恠其所以尋往白佛佛



告目連彼諸餓鬼業風吹去非汝聲聞所能  
知見蒙汝設會罪垢得除吾自能令來至會  
所佛為說法其夜命終生忉利天徑字函  
第五卷  
貧者雖窮應可施 阿誰無線并麩塵  
優婆塞戒經云無財之人自說無財是義不  
然何以故一切水草人無不有雖是國主不  
必能施雖是貧窮非不能施何以故貧窮之  
人亦有食分食已洗器弃蕩滌汁施應食者

亦得福德若以塵麩施於蟻子亦得無量福  
德果報天下極貧誰無塵許麩耶誰有二日  
食三揣麩命不全者是故諸人應以食半施  
於乞者善善子極貧之人誰有赤裸無衣服  
者若有衣服豈無一線施人天下之人誰貧  
無身如其有身見他作福身應往助亦名施

主亦得福德

尅字函  
第四卷

天下至難惟有五 困中能施以推先



四十二章經云天下有五難貧窮布施難豪  
貴學道難判命不死難得觀佛經難生值佛  
世難

不知足雖富而貧 若知足雖貧而富

四十二章經云佛告比丘汝脫諸苦惱當  
觀知足知足之法即是富樂安穩之處知足  
之人雖臥地上猶爲安樂不知足者雖處天  
堂亦不稱意不知足者雖富而貧知足之人

雖貧而富不知足者常爲五欲所牽爲知足  
者之所憐愍

辭字函

財屬五家非我物 慳不散施後生貧

寶積經云善安大梵天王太子語父母曰金  
銀琉璃水精碑磔碼碯明珠寧可藏乎欲濟  
貧乏况一切財業非是真實水火盜賊縣官  
惡子五家有分耳父母言善如子所志便取  
廣施

師字函  
第四卷

優婆塞戒經云若人得財貧



惜不施當知即是未來世中貧窮種子

剋字函第

卷五

親與非親應等惠

捨并不捨豈常存

寶積經云在家菩薩於自子所不應極愛若於子所生於極愛非他人所則爲自毀應以三法而自呵責何等爲三菩提道是平等之心非不平等心菩提道是正行所得非邪行得菩提道是無異行得非離行得復次應呵

已心於自子所生怨家想惡知識想非善知識想違逆佛智平等之慈害我善根彼應隨處自調於心如愛其子一切亦然如愛自身一切亦然應修是觀我異處來子異處來何以故一切衆生曾爲我子我亦是彼諸衆生子終不生念我子彼非何以故去至六趣而復爲怨或復爲子我其當作等親非親我以何故於其所親倍生愛與於非親所一切不



與若我生於愛不愛心不能趣法何以故不  
等之行至不等處行平等行至於等處我不  
應行是不等行我學等心與諸衆生至一切  
智又云在家菩薩乞者來求隨所施財應  
至心念我所施財及不施財俱當散滅不滿  
所願必當歸死我不捨財財當捨我我今當  
捨令作堅財然後乃死捨此財已死時無恨

始字函  
第二卷

獨輸牧女最先供復羨純阨末後食  
釋迦譜云佛成道時林外有一牧牛女人難  
陀波羅時淨居天來下勸言太子今者在於  
林中汝可供養女人聞已心大歡喜于時地  
中自然而生千葉蓮華華上有乳女人見此  
生奇特心即取乳糜至太子所頭面禮足而  
以奉上太子即便受彼女施而呪願之今所  
施食欲令食者得充氣力當使施家安樂無



病終保年壽智慧具足太子復言爲我成熟  
一切衆生故受此食即受食之身體光悅堪  
受菩提彩字函  
第三卷經律異相云佛臨入滅有  
拘尸城工巧之子名曰純陀泣告世尊我等  
從今無主無救貧窮孤困欲從如來求將來  
食唯願哀受我等微供然後涅槃佛言我今  
爲汝斷除貧窮以無上法雨雨汝身田令生  
法芽令汝具足檀波羅蜜純陀號哭復白大

衆同共禮勸佛莫涅槃佛告純陀諸佛法亦  
有爲亦然速辨所施不宜久停是時天人皆  
來奉供佛悉不受大衆唱言奇哉純陀成就  
大福我等供具則爲唐捐世尊欲滿衆望一  
一毛孔化無量佛一一諸佛各有無量諸比  
丘僧悉皆受供釋迦如來自受純陀所奉設  
者食滿八斛以佛神力皆悉充足一切大衆



薩埵投身憂虎餓 達王割肉貿鷹餓

金光明經云曩世有王摩訶羅陀生三太子  
長子名曰摩訶波那羅次子名曰摩訶提婆  
小子名曰摩訶薩埵出遊林野見有一虎適  
產七日而有七子周匝圍繞饑餓欲絕第一  
王子恠其饑逼必還噉子第三王子問言此  
虎所食何物第一王子報言此虎食新肉血  
第三子言君等誰能與此虎食第二子言此

虎饑困餘命無幾不容餘處爲其求食設餘  
求者命必不濟誰能爲此不惜身命第三王  
子作是念言我從昔來多棄是身都無利益  
復觀是身如水上沫多諸蟲戶不得可惡我  
今捨離以求寂滅無上法身愿兄遮難同還  
中路薩埵潛身後至虎所作是誓言我今爲  
利一切衆生求於菩提捨難捨故以餓虎前  
虎無能爲求刀不及即以乾竹刺頸出血於



高山上投身虎前。于時大地六種震動。是虎即舐王子身血。噉食其肉。唯留餘骨。二兄見地大動。疑弟捨身。共復虎前。果見如此。佛言。余時薩埵。今我身是。大王羅阇。今頭檀是。王妃夫人。今壓耶。是第一。王子。今彌勒。是第二。王子。今調達。是虎瞿夷。是虎七子者。今五比丘。及舍利弗。目犍連。是度無極經云。昔薩婆達王。普施衆生。恣其所索。天恐奪位。往而

試之。帝釋即現命。邊王曰。薩婆達王。慈潤滂沛。福德巍巍。懼奪吾位。即化為鷹。邊王作鵠。趣王廷下。恐怖告曰。哀哉。大王。吾命窮矣。王曰。莫恐。吾今活汝。鷹尋後至。云。鵠。此來。鵠是吾食。願王見還。王曰。鵠來逃命。終始無違。苟欲得肉。即當相與。鷹曰。唯願得鵠。不用餘肉。王曰。以何等物。令汝置鵠。歡喜而去。鷹曰。若王慈惠。憫衆生者。割王肥肉。而以易鵠。吾當



欣王入大喜自割解以對鴿稱之今與鴿  
等鴿之愈且割身肉盡故未能敵瘡痛無量  
王以慈忍又命近臣曰殺我稱髓令與鴿等  
吾奉佛戒濟衆危厄雖有衆惱由如微風焉  
能動太山耶鷹復本身誓首問曰大王何志  
苦惱若茲曰吾不志天帝釋及飛行皇帝吾  
觀衆生沒于盲冥誓願求佛救度彼衆帝釋  
驚曰我謂大王欲奪吾位是以相試王曰使

我身瘡瘳復如舊志常布施天藥傳之瘡瘳

頓愈誓首繞王三匝歡喜而去

靈字函  
第十卷

竭柝全軀書一偈 求聞半偈捨全軀

智度論云釋迦文佛爲菩薩時名曰樂法時  
世無佛不聞法語四方勤求了不能得公時  
有魔變作婆羅門語我有佛所說一偈汝能  
以皮爲紙以骨爲筆以血爲墨書寫此偈當  
以與汝樂法念言喪身無數不得是利即自



剥皮曝之令乾欲書其偈魔便滅身佛知至  
心郎從下方涌出為說深法得無生忍立字  
函第  
九涅槃經云過去佛日未出我於尔時作婆  
羅門修菩薩行遍求經典不聞名字雪山坐  
禪精修苦行釋提桓因變作羅刹形甚可畏  
唱過去佛所說半偈諸行無常是生滅法說  
已便住是苦行者聞此半偈心生歡喜四顧  
無人唯見羅刹而作是語適所聞偈啓悟我

心羅刹說耶或非說耶他答我言我不食來  
已經多日饑渴所迫心亂謬語非我本心之  
所知也我復語之汝所說者義猶未備若能  
為我說是偈竟我當終身為汝弟子羅刹答  
曰汝但念法不念我饑實不能說我即問言  
所食何物答所食者唯人暖肉及所飲者唯  
人熱血我語但為全舉是偈當以身施羅刹  
答言誰當信汝為八字故棄所愛身我即答



言捨不堅身得金剛身諸佛菩薩能證是事  
羅刹即說生滅滅已寂滅爲樂語汝已聞具  
足偈義當施我身時我踊躍若石若樹處處  
寫已即上高木自投而下羅刹復還帝釋之  
身接我置地以是因緣超十二劫在彌勒前  
成就菩提一字函  
第四卷  
施雖多而獲福少 施雖少而獲福多  
菩薩本行經上云賢者須達居家貧窮至信

道德往佛聽法佛問在家之士當行布施不  
布施也須達白佛當行布施多施耶少施耶  
以好意施耶不好意施耶佛言所施雖多而  
獲報少所施雖少而獲報多何謂施多而獲  
報少雖多布施而無至心無恭敬心不大歡  
喜貢高自大所施之人信邪倒見非是正見  
不得快士所施雖多而獲報少猶如耕田薄  
地之中下種雖多收實甚少何謂施少而獲



大福所施雖少歡喜心與清淨心與恭敬心  
與不望報與所施之人復得快士佛及辟支  
沙門四道應正見者所施雖少獲報弘大猶  
如良田所種雖少收實甚多器字 又般若  
經云何多行布施攝受少福少行布施攝受  
多福若諸菩薩雖經苑伽沙劫恒捨無量珍  
財施諸有情而不回向無上菩提願與有情  
皆同證得一切智智如是菩薩多行布施攝

受少福若諸菩薩雖經少時施有情類少分  
財物而能回向無上菩提如是菩薩行少布  
施攝受多福珠字函 第九卷

論其先苦而後樂 復有先樂而後苦

增一阿含經云比丘問佛以何因緣先苦後  
樂先樂後苦先苦後苦先樂後樂佛答若人  
百歲之中作諸功德或百歲中造諸惡業彼  
於異時或先受樂或先受苦如少去聲時作福



長時作罪後生之時少時受福長時受罪若  
少時作罪長時作福後生之時少時受苦長  
時受樂若復少長常作功德分檀布施彼於  
後生先後皆樂 又云共有人生卑賤之家  
然無邪見以知昔日施德之報感得富貴不  
作施德恒值貧賤能改所作後生饒富是謂  
先苦後樂或有人生豪族之家然彼邪見與  
邊見相應後生地獄若得為人在貧賤家是

謂先樂後苦或人先生貧賤之家然懷邪見  
與邊見後生地獄若貧賤家是謂先苦後苦  
或人先生富貴之家敬重三尊恒行惠施後  
生人天恒受富貴是謂先樂後樂馨字函  
第一卷  
或有身樂心不樂 或復心樂身不樂

增一阿含經云或有人身樂心不樂或有人  
心樂身不樂或身心俱樂或身心俱不樂若  
作福凡夫於四事中衣服飲食臥具醫藥無



所乏短。但不免三惡道苦。是謂身樂心不樂。  
若阿羅漢不作功德。於四事供養之中。不能  
自辨。但免三惡道苦。是謂心樂身不樂。若凡  
夫人不作功德。不得四事供養。復不免三惡  
道苦。是謂身心俱不樂。若作功德。阿羅漢四  
事供養。無所短乏。復免三惡道苦。是謂身心  
俱樂。馨字由  
第一卷  
或施有果而無用。或施有用而無果。

彌勒所問論云。布施果有四種。一有果無用。  
二有用無果。三有果有用。四無果無用。初有  
果無用者。謂不至心施。不自手施。輕心布施。  
彼如是施。雖得果報。不能受用。如舍衛天主。  
雖得種種珍寶。不能受用。二有用無果者。謂  
自不施。見他行施。起隨喜心。以是義故。雖得  
受用。而自無果。如天子物。一切沙門婆羅門。  
等。雖得受用。而自無果。又如轉輪聖王四兵。



雖得衣食而不得果。三有果有用者。謂至心  
施不輕心。施如樹提伽諸長者等。四無果無  
用者。謂布施已。因即滅盡。或為出世聖道時  
故。猶如遠離煩惱聖人。傳字函  
第四卷  
未離欲。施生人天。能起慈心成佛道。  
智度論云。未離欲。布施生人中富貴。及六欲  
天中。若離欲心。布施生梵世天上。乃至廣果  
天。若離色心。布施生無色天中。離三界布施。

為涅槃。故得聲聞道。布施時。惡厭憤鬧。好樂  
閑靜。喜深智慧。得辟支佛。布施之時。起大悲

心。欲度一切。得成佛道。名字函  
第二卷

受者因物以為恩。施人推憫有何愆。

文殊所問經下云。佛告文殊。如有一人。日日  
施食。有人來乞。因得食。故劫盜他財。是誰得  
罪。文殊白佛。非施主得罪。施主唯有施意。不  
令作盜。佛答如是如是。墨字函



但知不等爲平等 那識將兒付與兒  
文殊所問經下云文殊白佛菩薩能以妻子  
布施如醜婆羅門聞須達拏太子好施不逆  
人意就求二子以爲僕使歡喜施之子拒不  
隨被婆羅門鞭縛將去何無平等慈心佛告  
文殊如人有兩兒以其小兒施於大兒此父  
母是平等心否大兒打拍小兒遂死誰當得  
罪文殊白佛言世尊父母等心無有罪過大

兒自得此罪我於衆生常平等心如羅睺羅  
可愛可念提婆達多亦可愛可念是故菩薩  
無有罪過 墨字函

供養在心不在事 施先論心後論田

智度論問曰菩薩若以一食供養一佛及僧  
尚是難事何況十方諸佛及僧答曰供養在  
心不在事也若菩薩以一食大心供養十方  
佛僧不以遠近爲礙是故諸佛皆見皆受問



曰諸佛有一切智故皆見皆受僧無一切智云何得見得受答曰僧雖不見不知而其供養施者獲福譬如有人遣使供養彼人彼雖不得而此人已獲施福如慈心三昧於衆生雖無所施而行者功福無量名字函第二卷又問曰菩薩遇得便以供養何以隨意求索答曰福德從心於所愛重持用供養得福增多如阿育王因地小兒時以所重土持用奉佛得

閻浮提王若大人雖以多土施佛而無所得非所重故有人偏貴重華以其所貴持供養佛得福增多乃至隨宜寒衣熱扇亦復如是

建字函第十卷

宗鏡云如舍利弗以一鉢飯上佛

佛即回施狗而問舍利弗汝以飯施我我以飯施狗誰得福多舍利弗言如我解佛法義佛施狗得福多舍利弗者於一切人中智慧最上而佛福田最為第一不如佛施狗恩田



得福極多。以是故知。大福從心生。不在田也。  
如舍利弗。千萬億倍。不及佛心。問曰。如汝說。  
福田妙。故得福多。而舍利弗。施佛。不得大福。  
答曰。良田。雖復得福多。而不如心。所以者何。  
心爲內主。田是外事。菩薩本緣經。偈云。若行  
惠施時。福田雖不淨。能生廣大心。果報無有  
量。故知福從心生。不因田出。別請五百阿羅  
漢。不如依次一凡僧。何者。以平等心。福勝取

捨心福微。則勝芳由心。豈在田乎。施法既尔。

六度萬行亦然。

車字函  
第四卷

施雖悲田勝敬田。君但心等其福等。

諸經要集問。若施聖人。得福多者。云何經說。  
智人行施。不簡福田。答。今釋此意義。有多途。  
明能施之人。有愚智之別。所施之境。有悲敬  
之殊。悲是貧苦。敬是三寶。悲是田芳。而心勝  
敬是田勝。而心芳。若取心勝。施佛。則不如施。



貧故有諸衆生見他聚集作諸福業但求名聞傾家財物以用布施及見貧窮孤獨呵罵驅出不濟一毫如此衆生名爲顛倒作善癡狂禍福甚可憐憫用財甚多獲福甚少善男子我於一時告諸大衆苦人捨阿僧祇身供養十方諸佛菩薩聲聞不如有人施畜生一口飲食其福勝彼百千萬億乃至施與蟻等悲田最勝如舍利弗一飯上佛佛回施狗若

據敬法重人敬田即勝故又經云若施畜生得百倍報乃至須阨洹得無量報羅漢辟支尚不如佛况餘類也若據平等而行施者無問悲敬等心而施得福弘廣故維摩經云分作二分一分施佛難勝如來一分與城中最下乞人福田無二也

對字函  
第十卷

施藏無盡分十門 此義相對復五種

華嚴經云十無盡藏中第六施藏而有十種



謂分減施。竭盡施。內施。外施。內外施。一切施。過去施。未來施。見在施。究竟施。分減施者。謂菩薩好行惠施。若得美食。不專自受。要與衆生。然後方食。凡所受物。悉亦如是。若自食時。念我身中有八萬戶蟲。我身充樂。彼亦充樂。我身飢苦。彼亦飢苦。我受此食。願令衆生。普得充飽。爲施彼。故而自食之。竭盡施者。謂菩薩資生之具。有人來言。悉當與我。菩薩

念自無始。以饑餓。故喪身無數。未嘗辜許。饒益衆生。而獲善利。我今當同往。昔捨命。隨其所有。一切皆施。饒益於彼。盡命無憾。內施者。謂菩薩受輪王位。有人白言。重病將死。若得王身手足頭目。我必存活。菩薩念言。身後必死。無一利益。念已施之。外施者。謂菩薩受輪王位。有人言。貧願求其位。菩薩念言。榮盛必衰。至於衰時。不能饒益。我今隨彼。充滿



其意 內外施謂菩薩處輪王位有人白言  
王處已久願捨與我及王爲我臣僕菩薩念  
言身及王位悉是無常當以不堅而求堅法  
即便施之乃至以身恭勤作役 一劫施謂  
菩薩處輪王位時有貧人而乞國土或髓腦  
或妻子菩薩念言一劫恩愛會當離別以此  
皆施 過去施謂菩薩聞過去諸佛菩薩所  
有功德聞已不著了達非有但爲教化取著

衆生成熟佛法而爲演說復觀過去諸法十  
方推求都不可得畢竟皆捨 未來施謂聞  
未來佛之所修行了達非有不取於相不別  
樂生諸佛國土亦不生厭不以善根回向於  
彼亦不於彼而退善根但欲因彼境界攝取  
衆生成熟佛法然此法者非有處所非無處  
所非內非外非近非遠復作是念若法非  
有不可不捨 見在施謂菩薩聞諸天王乃



至二乘具足功德聞已心不迷沒但觀諸行  
如夢不實無有貪著為令眾生捨離惡趣修  
菩薩道成就佛法而為開演究竟施謂菩  
薩假有眾生諸根殘缺告言方便捨已所有  
令我具足菩薩觀身臭穢不淨云何戀著應  
以捨彼經僧祇劫諸根不具亦不悔惜復念  
此身危脆不堅我今云何而生戀著應以施  
彼充滿其願章字函諸經要集云布施五

種相對謂田財對輕重對空有對多少對染  
淨對對復有四 第一田財相對一田勝財  
劣如童子施土與佛二財勝田劣如將珍寶  
施貧人等三田財俱勝如將寶施佛四田財  
俱劣如將草施畜等 第二輕重相對一心  
重財輕如貧女將一氈施大眾得福弘多二  
財重心輕如王夫人心慢多將寶物施衆僧  
得福甚少三四類 第三空有相對一心空

三四類

第三空有相對一心空



不空境如雖學空觀照惜財不施還得貧報  
二空境不空心知其財施得富弘多樂捨得  
福三四類  
前可知第四多少相對法句喻經云施  
有四事一施多得福少者如愚癡之人祭祀  
費用無有福慧是為施多得福少二施少得  
福多者如以慈心供道德人精進學誦此施  
雖少其福彌大是為施少得福多三施少得  
福少者慳貪惡意施邪見人俱兩愚癡是謂

施少得福亦少四施多得福多者若有覺世  
無常建立塔寺供養三尊福如大河流入于  
海世世不斷是為施多其報亦多 第五染  
淨相對一施者清淨受者不淨二施者不淨  
受者清淨三施受俱淨四施受俱不淨且解  
一句餘三可知何等三俱清淨者如寶積佛

寄華奉上釋迦文佛對字函  
第十卷

大施三輪清淨空 一檀具六波羅蜜



般若經云舍利子問善現言云何修檀波羅  
蜜多。答云二種。一者世間。二出世間。善現。若  
若菩薩爲大施主。能施沙門婆羅門。孤露乞  
者。隨其所須。悉皆施與。若復有求妻子王位  
頭目髓腦。內外之物。並皆施與。雖作是施。而  
有所依。謂作是念。我施彼受。以有所得。而爲  
方便。與諸有情。同共回向阿耨菩提。復作是  
念。我持此福。施諸有情。令得此世他世安樂。

乃至證得無餘涅槃。彼著三輪而行布施。一  
者自想。二者他想。三者施想。由著此三輪而  
行施。故名世間布施。波羅蜜多。何緣此施。名  
爲世間。以與世間同共行。故舍利子言云何  
出世間布施。波羅蜜多。善現。答言。若菩薩行  
布施時。三輪清淨。一者不執我爲施者。二者  
不執彼爲受者。三者不著施及施果。是爲菩  
薩行布施時。三輪清淨。舍利子。若菩薩以大



悲爲首所修施福普施有情於諸有情都無所得雖與有情同共回向阿耨菩提而於其中不見少相由都無所執而行施故名出世間布施波羅蜜多何緣此施名出世間不與世間同共行故能超越出世間法故乃至持戒安忍精進靜慮般若五波羅蜜中唯出世間三輪清淨一者不執我能修二者不執所爲有情三者不著其果餘義與施皆同

恭字  
函第

卷五

又金剛般若云菩薩於法應無所住行於布施所謂不住色布施不住馨香味觸法布施菩薩應如是布施不住於相何以故若菩薩不住相布施其福德不可思量須菩提於意云何東方虛空可思量不也世尊須菩提南西北方四維上下虛空可思量不也世尊須菩提菩薩無住相布施福德亦復如是不可思量須菩提菩薩但應如所教住



頌曰若論無相施功德極難量行悲濟貧乏  
果報不須望凡夫情行劣初且略稱揚欲知  
檀狀貌如空徧十方智度論云一念中能  
行六波羅蜜多謂布施時如法捨財是檀波  
羅蜜安住大善道中布施不向二乘是尸波  
羅蜜慳等煩惱及魔等來不能動心是羸提  
波羅蜜布施不息是精進波羅蜜攝心不散  
無疑無悔是禪波羅蜜與者受者乃至財物

俱不可得是般若波羅蜜

正字函  
第一卷

先讚彼施使破慳後毀此檀令勿著

大乘論曰譬如如來先爲一人讚歎布施後  
還毀咎釋曰有衆生如來先爲讚歎布施功  
德後時或毀此施何以故若人於財物有慳  
悵心爲除此心故先爲讚嘆布施若人已樂  
行施施是下品善根如來復毀此施令彼渴  
仰其餘勝行若不由此意讚而又毀則成相



違由有此意故一施中雖是讚毀違而不違

與字函 第六卷

財施輪回非解脫 法檀出世永逍遙

未曾有經云帝釋問野干曰施食施法有何

功德荅曰布施飲食濟一日之命施珍寶財

物濟一世之乏增益繫縛說法教化名為法

施能令衆生出世閒道 奄字函 大丈夫論

云財施者人道中有法施者大悲中有財施

者除衆生身苦法施者除衆生心苦財施者

為其作無盡錢財法施者為得無盡智財施

者為得身樂法施者為得心樂財施者為衆

生所愛法施者以為世閒所敬財施者為愚

人所愛法施者為智者所愛財施者能與現

樂法施者能與涅槃之樂 盡字函 第九卷 法苑云

比丘比丘尼優婆塞優婆夷能教化人具足

施戒多聞智慧若以紙墨令人書寫若自書



寫如來正典然後施人令得讀誦其名法施  
如是施者未來天上得好上色何以故眾生  
聞法斷除瞋心以是因緣未來世中得成上  
色眾生聞法慈心不殺以是因緣未來世中  
得壽命長眾生聞法不盜他財以是因緣未  
來世中多饒財寶眾生聞法開心樂施以是  
因緣未來世中身得大力眾生聞法離諸放  
逸以是因緣未來世中身得安樂眾生聞法

除愚癡心以是因緣未來世中得無礙辯眾  
生聞法信心無疑以是因緣未來世中信心  
明了故知法施殊勝過於財施經字函第十卷又

偈云百千世界中滿中真金施不如一法施  
隨順令修行隸字函第七卷又金剛經偈云寶滿

三千界齋持作福田唯成有漏業終不離人  
天持經取四句與聖作良緣欲入無為海須  
乘般若船



行世間檀心顛倒 出世間施聖稱揚  
智度論云出世間檀清淨不雜諸垢智慧和  
合是聖人所稱譽世間檀不清淨雜諸結使  
顛倒心著是聖人所不稱譽 問曰云何名  
檀答曰布施心相應善思是名為檀又云有  
信有福田有財物三事和合時心生捨法能  
破慳貪是名為檀檀有種種利益檀為寶藏  
常隨逐人檀為破苦能與人樂檀為善御開

示天道檀為善府攝諸善人檀為安穩臨終  
不怖檀為集樂能破苦賊檀為大將能伏慳  
敵檀為妙果人天所愛檀為淨道聖賢所由  
富貴安樂之林藪得道涅槃之津梁德字函 第一卷  
又云檀有三種一者財施二者法施三者無  
畏施持戒自檢不侵一切眾生財物是行財  
施能種種說法令其開悟名為法施眾生畏  
死持戒不害名無畏施德字函 第四卷



聲聞雖施終此岸 菩薩行檀始那邊

智度論問曰阿羅漢辟支佛亦能到彼岸何  
以不名波羅密答曰羅漢辟支度彼岸與佛  
度彼岸名同而實異彼以生死爲此岸涅槃  
爲彼岸而不能度檀之彼岸所以者何不能  
以一物一切時一切種布施設能布施亦  
無大心或以無記心或有漏善心或無漏心  
施無大悲心不能爲一切衆生施菩薩施者

知布施不生不滅無漏無爲如涅槃相爲一

切衆生故是名檀波羅密

德字函  
第二卷

法苑云云

何布施得到彼岸不得彼岸答曰如舍利弗  
六十劫中行菩薩道欲度彼岸時有人來就  
乞其眼舍利弗言眼無所任何以索之若須  
我身及財物者當以相與答言不須唯欲得  
眼尔時舍利弗出一眼與之乞者得眼於舍  
利弗前嗅之嫌臭唾而弃地又以脚踏舍利



弗思惟眼實無用而強索之。如此人輩不可  
度也不如自調早度生死於菩薩道退回小  
乘是名不到彼岸。府字函 第一卷

迷心利己墮聲聞 達法利他超菩薩

智度論云不為眾生亦不為知諸法實相故  
施但求脫生老病死是為聲聞檀為一切眾  
生故施亦為知諸法實相故是為諸佛菩薩  
檀於諸功德不能具足但欲少許分是為聲

聞檀一切功德欲具滿足是為諸佛菩薩檀  
畏老病死故施是為聲聞檀為助佛道為化

眾生不畏老病死是為諸佛菩薩檀。德字函 第一卷

不惟布施能生福 元來慳怯也招殃

正法念處經云不施資財不以法施不施無  
畏常懷慳嫉以是因緣生餓鬼中。初字函 第六卷

施法雖是善因緣 為財翻招惡果報。法施

分三



諸經要集云。為財物故。與人說法。不以悲心。利益眾生。而取財物。或用飲酒。或與女人共飲。共食。如伎兒。見法自賣。求財。如是法施。其果甚少。生於天上。作智慧鳥。能說偈頌。是名下品法施。為名聞。故為勝餘法師。故為人說法。得報亦少。生於天中。受中異報。或生人中。是名中品法施。以清淨心。為欲增長眾生智慧。及邪見者。令住正法。不為財利。如是法施。自

利利人。無上最勝。乃至涅槃。其福不盡。是名上品法施。又云。若慳慳法。障他慧明。由是常生邊地。無佛法處。此則不如賣法。他人反勝過此。張字函 第二卷

修慧無福。乾慧貧。修福無慧。癡福濁。

經律異相云。迦葉佛時。兄弟二人。共為沙門。兄持戒坐禪。一心求道。而不布施。弟乃修福。而常破戒。後報生中。兄雖為人。從釋迦出家。



得阿羅漢衣常不充食常不飽弟生象中能  
却怨敵國王所愛金銀珍寶瓔珞其身封數  
百戶邑以供給之時兄比丘值世大歉遊行  
七日乞食不得末後得少麤食知象是前世  
弟而語之曰我昔與汝俱有罪也象識宿命  
憂愁不食王問有人犯此象不荅曰唯一沙  
門來至象邊便去王覓沙門問之對以前因  
王意乃悟

丙字函  
第七卷

財法二施始成功 福慧兩全方作佛

法苑云前五度譬同盲人第六般若事同有  
目若不得般若開導前五便墮惡道不成出  
世若聞法施過於財施愚人不解即便秘財  
唯樂讀經若行此法不如有人解心布施一  
錢勝如迷心讀經百千萬卷是故如來設教  
意存解行解即慧  
行即福唯解無行解即便虛唯行  
無解行即便孤要具解行方到彼岸復次唯



解無行。如人有目無足不能遠涉。唯行無解。  
如人有足無目不能見道。是故要須解行。雙  
行方成佛果。經字函  
第十卷

大藏一覽集卷第二

